

20/04/2002

Kelisa pandu sebelah kiri dikeluarkan akhir tahun

KERETA Kelisa pandu sebelah kiri yang dijangka dikeluarkan menjelang akhir tahun, mungkin dapat membuka pasaran baru bagi Perusahaan Otomobil Nasional Kedua (Perodua), pembuat kereta nasional kedua.

"Kami sedang menjalankan penyelidikan dan pembangunan (R&D) yang perlu. Jika semuanya berjalan lancar, kami berharap dapat mengedarkan kereta Kelisa pandu sebelah kiri menjelang akhir tahun," kata Pengarah Eksekutif Jualan Perodua, Zainuddin Bahaudin, seorang daripada 185 anggota perwakilan yang mengiringi Perdana Menteri Datuk Seri Dr Mahathir dalam lawatannya ke Maghribi, Libya dan Bahrain.

Zainuddin mengikuti rombongan tersebut dalam misi meneroka pasaran baru bagi Perodua.

Katanya, beliau sudah dihubungi oleh lapan pihak yang berminat terhadap kereta Kelisa iaitu tiga di Libya dan lima di Maghribi.

"Kami sedang mengkaji untuk mengesport Kelisa ke pasaran ini. Satu pasukan susulan akan dihantar ke kedua-dua negara itu untuk menguruskannya jika ia berdaya maju," katanya kepada Bernama di Tripoli.

Kereta Kelisa pandu sebelah kiri pertama akan dieksport ke negara Asia Barat, termasuk Mesir, Jordan, Syria dan Lubnan menjelang pertengahan tahun ini.

Bagaimanapun, bilangan unit yang akan dieksport ke Timur Tengah masih belum ditentukan.

Kereta Kelisa pandu sebelah kanan dieksport ke United Kingdom sejak Januari lalu.

Zainuddin berkata, dengan harga yang sesuai, pasaran baru bagi Kelisa boleh dikembangkan di Maghribi dan Libya.

Pada masa ini, kereta yang dikeluarkan di Eropah, kebanyakannya dengan kapasiti enjin melebihi 1.1 liter, menguasai pasaran di kedua-dua negara itu.

(END)